

## DIU BERNAT DE BASELL

I

Bernarz diz de Baseill  
qe·s fara chantaire;  
e no s'en meraveill  
hom de son repaire,  
car ben e gen sap trobar,  
e moz e coblas laçar;  
per qe·m par  
qe de tot penra venjanssa  
de paraulas e de lanssa,  
e non er per lui celaz  
dels laiz ni dels coronaz.

II

Ges no s'en engrondeill  
per nebot ni fraire  
de Salsas tro Ereill,  
c'us no s'en poc raire;  
qe mal se saubon venjar  
d'En Berengier de Monclar,  
qe naffrar  
lo cuidet per mi la panssa;  
mas no·l sap qui no·l romanssa,  
qe de premiers fo abaz,  
mas lo reis l'a a postaz.

III

A peiras e anels  
et deniers de borsa,  
com conquerrez castels  
e prenez per corsa  
ses lanssa e ses escut?  
Per qe mi par tot perdut.  
Tal sai drut  
qe porta cofa cornuda,  
e sai qui es tals sa druda;  
mas non l'en vuoill descobrir,  
car hom sui que tem maldir.

Berguedà, Guillem de. "Diu Bernat de Basell"